



Arnat naartusut erninissaannut sapaatip akunneri sisamaannangortut tagginneqarneraniit naartunerminnut atatillugu sulinngiffeqartalernissaat pillugu Naartunermi, erninermi meeravissartaarnermilu sulinngiffeqartarneq ullormusiaqartarnerlu pillugit Inatsisartut inatsisaata nr. 14-p, 7. december 2009-imeersup allannguutissaanik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Randi Vestergaard Evaldsen, Demokraati
(Siullermeerneqarnera)

Inatsisartunut ilaasortaq Randi Vestergaard Evaldsen qutsavigerusupparput manna siunnersuutaa pillugu.

Angajoqqaanngorneq inuunitsinni allanngoriarnerit annerpaartaraat. Taamaattumik aamma isumaqarpugut angajoqqaanngortussat angajoqqaanngornissaminnut piareersimasutut misigisimasassasut.

Naalugiarsuup inuunerani sapaatip akunneri siulliit angajoqqaanngorlaanut artornarnerpaajugunarput, tassani imminut ilinniarnissaq pisarmat. Taamaattumik isumaqarpugut piareersimalluinnassagaanni piffissamullu tassunga naalugiarsummut naleqarluinnartumut nukissaqassagaanni, angajoqqaat pisariaqartippaat eqqissisimaqqissaarnissartik aamma taamaattumik isumaqarpugut manna siunnersuut akuerineqartariaqartoq.

Suliffeqaraanni artornartumik imaluunniit anaanaasoq naartunermini atungarliorsimappat, anaanaasorlu qasuersaarnissaminut periarfissaqarsimanngippat qitornartaarneq imaannaanngissinnaavoq ajornerpaamillu pisoqassappat imaassinnaavoq allaat anaanangortup naalugiarsuup pisariaqartitaanut nukissaqanngitsorluunniit.

Uangutsinnut pingaaruteqarpoq angajoqqaanngortussat toqqissisimallutik angajoqqaanngortarnissaat aamma taamaattumik siunnersuut manna tapersorsorparput, inatsimmi ullumikkut atuuttumi tamanna qularnaarneqarnikuunngimmat, allareernitsitummi erninerit amerlasuut pisartut ernivissatut ulloq tagginneqartoq sioqqullugu.

Nuannaarutigaarput Naalakkersuisut pilersaaruteqarmata angajoqqaat inatsisaannik amerlasuunik pissanganartunik allannguinnissaminnut aamma sulissutigineqarmat ataatsimoortumik angajoqqaanut politikkeqalernissaq.

Isumaqarpugut arnat naartunerminnut atatillugu sulinngiffeqarsinnaanerannut apeqqutaassanngitsoq illoqarfimmi ernivigisinnaasamini najugaqarnersoq najugaqannginnorsorluunniit. Isumaqaratta



anaangortussat tamarmik qitornartaamik inunngornissaannut sapinngisamik pitsaanerpaamik piareersarnissaminnut periarfissaqartariaqartut.

Siunnersuutit matumatut ittut ilaqutariinnut politikissamut tunngaviullik. Isumaqarpugut utaqqisariaqanngitsugut. Taamatut oqaaseqarluta siunnersuut taamatut isikkoqartillugu akuerivarput innersuullugulu Ilaqutariinnermut Peqqissutsimullu Ataatsimiititaliamut.